
Y CYNGOR DYDD IAU, 5 HYDREF 2017

Yn bresennol: Y Cynghorydd Annwen Daniels (Cadeirydd);
Y Cynghorydd Annwen Hughes (Is-gadeirydd).

Y Cynghorwyr: Craig ab Iago, Menna Baines, Freya Hannah Bentham, Dylan Bullard, Stephen Churchman, Steve Collings, R.Glyn Daniels, Anwen Davies, Elwyn Edwards, Aled Evans, Dylan Fernley, Peter Antony Garlick, Simon Glyn, Gareth Wyn Griffith, Selwyn Griffiths, John Brynmor Hughes, Louise Hughes, R.Medwyn Hughes, Judith Humphreys, Nia Jeffreys, Peredur Jenkins, Aeron M.Jones, Aled Wyn Jones, Anne Lloyd Jones, Berwyn Parry Jones, Charles W.Jones, Elin Walker Jones, Elwyn Jones, Eric Merfyn Jones, Huw Wyn Jones, Keith Jones, Kevin Morris Jones, Linda A.W.Jones, Sion Wyn Jones, Eryl Jones-Williams, Cai Larsen, Beth Lawton, Dilwyn Lloyd, Dafydd Meurig, Dilwyn Morgan, Linda Morgan, Dafydd Owen, Dewi Owen, W.Roy Owen, Jason Wayne Parry, Nigel Pickavance, Rheinallt Puw, Peter Read, Dewi Wyn Roberts, John Pughe Roberts, W.Gareth Roberts, Mair Rowlands, Paul Rowlinson, Angela Russell, Dyfrig Siencyn, Gareth Thomas, Ioan Thomas, Catrin Wager, Eirwyn Williams, Elfed Williams, Gareth Williams, Gethin Glyn Williams, Gruffydd Williams ac Owain Williams.

Hefyd yn bresennol: Dilwyn Williams (Prif Weithredwr), Morwena Edwards ac Iwan Trefor Jones (Cyfarwyddwyr Corfforaethol), Dafydd Edwards (Pennaeth Cyllid), Geraint Owen (Pennaeth Cefnogaeth Gorfforaethol), Iwan Evans (Pennaeth Gwasanaeth Cyfreithiol / Swyddog Monitro), Rhun ap Iarll (Uwch Gyfreithiwr / Dirprwy Swyddog Monitro), Siôn Huws (Uwch Gyfreithiwr - Corfforaethol), Sioned E Williams (Pennaeth Economi a Chymuned), Ian Jones (Uwch Reolwr Cefnogaeth Gorfforaethol) Arwel E. Jones a Janet Roberts (Uwch Reolwr Cefnogaeth Gorfforaethol), Vera Jones (Rheolwr Democratiaeth) Jeremy Evans (Swyddfa Archwilio Cymru) a Siôn Owen (Swyddog Cefnogi Aelodau).

Ymddiheuriadau: Y Cynghorwyr Alan Jones Evans, Berwyn P. Jones, Charles W. Jones, Mike Stevens.

1. COFNODION

Llofnododd y Cadeirydd gofnodion Cyfarfod y Cyngor a gynhaliwyd ar 15 Mehefin, 2017, a chyfarfod Arbennig y Cyngor a gynhaliwyd ar 28 Gorffennaf, 2017 fel rhai cywir.

2. DATGAN BUDDIANT PERSONOL

Dim

3. CYHOEDDIADAU'R CADEIRYDD

(1) Cydymdeimlad

Cydymdeimlwyd â theuluoedd y cyn Gyngorwyr Trevor Edwards a Brian Jones. Nodwyd y bu'r ddau yn gyngorwyr cydwybodol a gweithgar, gan wasanaethu eu cymunedau a'r sir mewn modd clodwiw iawn. Talwyd teyrnged i'r cyn Gyng Trevor Edwards gan y Cyng Eric M. Jones, a'r cyn Gyng Brian Jones gan y Cyng Sion Jones.

Nodwyd bod y Cyngor hefyd yn dymuno cofio am bawb o fewn cymunedau'r sir oedd wedi colli anwyliaid yn ddiweddar.

Safodd y Cyngor fel arwydd o barch.

(2) Llongyfarchiadau

Llongyfarchwyd pawb o Wynedd a fu'n llwyddiannus yn Eisteddfod Genedlaethol Ynys Môn yn ddiweddar, yn enwedig Gwion Hallam ar ennill y Goron, ac Osian Rhys Williams ar gipio'r Gadair.

Hefyd, diolch i'r holl staff a fu'n ymwneud a'r trefniadau llwyddiannus ar gyfer taith baton y Gymanwlad yng Ngwynedd fis diwethaf.

4. CWESTIYNAU

(1) Cwestiwn gan y Cynghorydd Dewi Wyn Roberts

“Yn fy ward fy hun (Abersoch) mae pryder mawr ynglŷn â'r cynigion i gau Meddygfa cangen.

Bydd Pwyllgor Lleol Gwynedd o'r Cyngor Iechyd Cymuned yn gwahodd cynrychiolwyr o'r Bwrdd Iechyd i drafod materion gofal iechyd sylfaenol yng Ngwynedd. Credaf fod y sefyllfa recriwtio a chadw Meddygon Teulu yng Ngwynedd yn argyfwng sy'n aros i ddigwydd. Bydd hyn yn rhoi mwy o bwysau ar wasanaethau gofal yn enwedig mewn ardaloedd gwledig.

Sut mae'r Cyngor ar y cyd gyda'r Bwrdd Iechyd yn paratoi ar gyfer sefyllfa fregus gyda gwasanaeth meddygon yng Ngwynedd ar hyn o bryd, a pha gynlluniau sydd ar y gweill yn y tymor byr a'r hirdymor i ddatrys recriwtio staff meddygol - oes yna ymateb a neu drafodaethau i sicrhau gwasanaeth addas meddygol i gleifion a chyhoedd y Sir?”

Ateb gan yr Aelod Cabinet Oedolion, Iechyd a Llesiant, y Cynghorydd W. Gareth Roberts

(Dosbarthwyd ateb ysgrifenedig yr Aelod Cabinet i'r cwestiwn i'r aelodau ymlaen llaw.)

“Rwyf yn ymwybodol iawn o'r cefndir ac yn deall pam bod y Cynghorydd Dewi Roberts yn codi'r cwestiwn yma. Mae'r heriau sy'n wynebu gofal cychwynnol yn genedlaethol ac yn lleol yn sylweddol. Mae poblogaeth sy'n heneiddio, daearyddiaeth wasgaredig, galw cynyddol, anhawster cyson i recriwtio a chadw staff, a'r angen i ddatblygu patrymau darparu gwasanaeth newydd yn creu sefyllfa heriol yn y maes iechyd a gofal.

Nid oes ateb syml i'r cwestiwn yma, mae hi'n gynyddol amlwg nad yw'r dulliau traddodiadol o weithredu bellach am ddiwallu'r angen ac o ganlyniad rhaid cychwyn ar daith o newid a datblygu'r hun sydd am fodloni'r galw cymhleth ohoni.

Mewn gwirionedd, cwestiwn sy'n ymwneud a recriwtio meddygon a staff iechyd yw hwn ac wrth gwrs, rôl y Bwrdd Iechyd fyddai cydlynu ymdrechion i ymateb yn ffurfiol i'r sefyllfa yma.

Wedi dweud hyn, un o flaenoriaethau'r Cyngor yma ydi ymateb i'r angen i wella'r ffyrdd yr ydym yn cefnogi oedolion sydd yn derbyn gwasanaethau iechyd a gofal. Mae'r gwaith o atal problemau rhag codi yn y lle cyntaf neu ymateb mor fuan â phosib pan fo materion yn codi yn un o brif egwyddorion y Ddeddf, ac rwyf yn hyderus y bydd y gwaith partneriaeth gyda'r

Bwrdd Iechyd i ddarparu gwasanaethau gofal ac ataliol yng Ngwynedd yn arwain at ysgafnhau'r baich a'r angen am ofal clinigol.

Mae llawer iawn o waith yn digwydd wrth ymateb i'r angen i wella'r ffyrdd yr ydym yn cefnogi pobl sydd yn derbyn gwasanaethau iechyd a gofal. Ond mae gofyn i ni feddwl yn wahanol, a rhan o hyn yw edrych ar draws yr holl ystod o wasanaethau a chyfleodd sydd mewn cymunedau. Rydym ar siwrne uchelgeisiol a heriol ond rwy'n grediniol ein bod yn gwneud cynnydd da gyda'r gwaith o wella hyn, er bod llawer o waith pellach i'w wneud."

Cwestiwn Atodol gan y Cynghorydd Dewi Wyn Roberts

"Gan gyfeirio at Llythyr Dr EL Jessup ar ran y Pwyllgor Meddygon Teulu Gogledd Cymru i Aelodau Senedd ar y 7fed Awst 2017 lle maen nhw yn dweud -

'The Llyn peninsula is also badly affected, Criccieth practice having just given in their notice of closure. The domino effect that has long been forecast is now seriously looming on the horizon.

There has been a seeming absence of proactive action to address the fundamental issues behind the crisis we now face.

Just this week, we were distressed to hear that trainee posts appear to have been withdrawn from the pool that exists in North Wales. Good candidates have moved up to North Wales in anticipation of applying for these posts and are left disappointed by this seemingly precipitous decision.'

Gaf ofyn pam mae penderfyniad wedi ei wneud - I dynnu nôl swyddi hyfforddiant meddygon yn Gogledd Cymru pam mae hi mor amlwg fod recriwtio yn anodd, ac am cadarnhad ein bod yn cadw llygaid barcud at y sefyllfa er mwyn lles ein trigolion yng Ngwynedd."

Ateb gan yr Aelod Cabinet oedolion, Iechyd a Llesiant, y Cynghorydd W. Gareth Roberts

"Mae hyfforddi meddygon teulu yn cymryd 3 blynedd. Mae 18 mis yn cael ei dreulio mewn Meddygfa a 18 mis yn yr Ysbyty yn gweithio ym maes pobl hyn, plant, obstetric ac Iechyd meddwl. Ar ddiwedd y 3 blynedd mae'n rhaid i'r Meddyg basio arholiad cymhwys. Mae 8 meddyg y flwyddyn yn cael ei recriwtio i'r cynllun yn Ysbyty Gwynedd, mae Ysbyty Glan Clwyd ac Ysbyty Maelor Wrecsam yn derbyn meddygon i hyfforddi hefyd.

Peth arall i'w nodi. Mae Llywodraeth Cymru yn rhoi £20,000 o ysgogiad i bobl ymuno yn y cynllun. Hefyd mae posib i rywun wneud y cynllun yn rhan amser, ond mae o felly yn cymryd mwy na tair blynedd i gwblhau, yr un peth yn digwydd os bydd cyfnod o famolaeth yn digwydd."

(2) Cwestiwn gan y Cynghorydd Owain Williams

"Yn dilyn pleidlais yn ddiweddar yn y Cyngor i wrthod cynnig a olygai torri tâl Aelodau'r Cabinet a Chadeiryddion o rhwng £2,000 a £3,000 y pen. Faint yn union fydd y swm ychwanegol hwn yn ei gostio i'r Cyngor hwn ac i'r trethdalwyr?"

(Dosbarthwyd ateb ysgrifenedig yr Aelod Cabinet i'r cwestiwn i'r aelodau ymlaen llaw.)

Ateb gan y Cynghorydd Dyfrig Siencyn, Arweinydd y Cyngor:

Panel Annibynnol Cymru ar Gydabyddiaeth Ariannol sy'n gosod yr arweiniad yn genedlaethol ynghylch lefel Cyflogau ar gyfer aelodau etholedig. Yr unig elfen o hyblygrwydd o fewn y canllawiau yw'r cyfrifoldeb ar wahanol gynghorau i benderfynu gosod Cyflogau Aelodau Cabinet a Chadeiryddion Pwyllgorau ar un o ddwy lefel.

Penderfynodd y Cyngor yn ei gyfarfod ar 18 Mai 2017 i gadw lefel cyflog Aelodau Cabinet ar Lefel 1 (£29,100) a Chadeiryddion Pwyllgorau ar lefel 1 (£22,100), yn unol â phenderfyniad y flwyddyn flaenorol ar y sail ei fod yn adlewyrchu'r cyfrifoldeb a'r llwyth gwaith ynghlwm a'r rolau dan sylw.

Mewn geiriau eraill, nid oedd swm ychwanegol i'r Cyngor ei dalu ar sail y penderfyniad hwn.

Dylid nodi fodd bynnag fod pob cyflog aelod wedi codi o £100 yn y flwyddyn ariannol 2017/18 (gan gynnwys yr uwch gyflogau), felly mae'r costau ychwanegol i'r Cyngor eleni yn seiliedig ar arweiniad y Panel Annibynnol yn £100 fesul aelod, sef cyfanswm o £7,500.

Petai'r Cyngor wedi pleidleisio gyda'r cynnig i newid y Cyflogau i Lefel 2 ar gyfer Aelodau'r Cabinet a'r Cadeiryddion, yna byddai wedi arwain at arbediad o £37,200.

6. ADRODDIAD BLYNYDDOL Y PWYLLGOR SAFONAU 2016/17

Cyflwynodd Dr Einir Young, Cadeirydd y Pwyllgor Safonau ei hadroddiad am 2016/17.

Nododd fod llwyth gwaith y Pwyllgor yn dyst i safonau ymddygiad uchel ym mywyd cyhoeddus, a bod pwyslais y Pwyllgor wedi bod ar hyfforddiant a gwella ymwybyddiaeth aelodau Gwynedd mewn cyfnod ariannol anodd, a chyfnod gwleidyddol cythryblus.

7. AELODAETH Y PWYLLGOR SAFONAU

Cyflwynodd y Dirprwy Arweinydd, y Cynghorydd Mair Rowlands adroddiad yn nodi fod angen penodi dau aelod etholedig i'r Pwyllgor Safonau.

Cynigiwyd a eiliwyd argymhelliad Grŵp Busnes y Cyngor fod y Cynghorwyr Anne Lloyd Jones a Beth Lawton yn cael eu penodi'n aelodau o'r Pwyllgor Safonau.

PENDERFYNWYD

Penodi'r Cynghorwyr Anne Lloyd Jones a Beth Lawton yn Aelodau o'r Pwyllgor Safonau

8. Y DREFN O GANFOD ARBEDION I'R DYFODOL

Nododd y Cynghorydd Peredur Jenkins, Aelod Cabinet Cyllid fod y Cyngor yn parhau mewn cyfnod heriol. Atgoffodd y Cyngor fod cyflawni arbedion Her Gwynedd bron a'u cwblhau, a'i fod wedi bod yn drefn lwyddiannau er mwyn canfod yr arbedion angenrheidiol. Fodd bynnag 'roedd wedi dod i'r amlwg fod angen trefn arbedion newydd i'r dyfodol

Derbyniwyd cyflwyniad gan y Prif Weithredwr. Nododd fod y Cyngor wedi bod yn canfod arbedion ers 2006 er mwyn cwrdd ag effeithiau chwyddiant a phwysau ar wasanaethau. Gydag effaith toriadau Llywodraeth y DU yn parhau, yn ogystal ag ansicrwydd Brexit, 'roedd yn gynyddol amlwg fod angen dechrau cynllunio arbedion i'w gweithredu o 2019/20 ac ymlaen.

'Roedd yr adran Cyllid wedi taflunio nifer o sefyllfaoedd cyllidol, a byddai'r Cabinet yn penderfynu ar dargedau arbedion gwahaniaethol i'r adrannau er mwyn cwrdd â'r sefyllfaoedd mwyaf tebygol. Byddai'r penaethiaid adran wedyn yn cyflwyno arbedion posib i gwrdd a'r targedau hynny i'r Pwyllgorau Craffu herio'r cynlluniau ar ran pobl Gwynedd.

Wedi i'r Aelodau gael cyfle i leisio'u barn byddai ymgynghoriad cyhoeddus yn cael ei gynnal, cyn mynd ymlaen i benderfynu a gweithredu ar y cynlluniau arbedion terfynol.

Yn dilyn y cyflwyniad manteisiodd yr aelodau ar y cyfle i ofyn cwestiynau a rhoi sylwadau:

Nodwyd fod y darlun yn ymddangos yn un difrifol iawn a bod cyfrifoldeb torfol i wneud y gorau o'r sefyllfa a chymryd rhan.

Nodwyd ei fod yn ymddangos fod codiad treth Cyngor yn cael ei gyfyngu i 5% gan y Cynulliad. Cwestiynwyd a fyddai cyfyngiad o'r fath yn parhau, a beth fyddai codiad treth cyngor o 5% yn ei olygu? Pe bai'r Cyngor yn dilyn model Sgandinafaidd, faint o godiad yn y dreth fyddai ei angen i wella gwasanaethau?

Mewn ymateb nododd y Pennaeth Cyllid nad oedd wedi craffu modelau sgandinafaidd, a thra byddai codiad o 5% yn golygu tua £3.5 miliwn ychwanegol i goffrau'r Cyngor, ni fyddai hynny yn cwrdd â chwyddiant. Nododd y Prif Weithredwr na fu erioed gyfyngiad ffurfiol mewn lle, ac 'roedd yn amau y byddai yna awdurdod lleol yn rhywle yn wynebu'r pwysau i groesi'r 5% cyn y byddai Gwynedd yn wynebu hynny, gan fod y sefyllfa yn mynd yn eithriadol o fregus mewn aml i le.

Nodwyd bod rhai gwasanaethau eisoes o dan bwysau enbyd a holwyd ble oedd y llinell lle na ellid torri ymhellach?

Mewn ymateb nododd y Prif Weithredwr nad oedd yn eglur eto ble oedd y llinell honno, ond fod angen sicrhau fod pob gwastraff ac opsiwn arall wedi ei ganfod a'i wyntyllu cyn ei chyrraedd.

Nodwyd fod trafodaethau wedi eu cynnal er mwyn cydweithio gyda chynghorau Tref a Chymuned er mwyn cynnal gwasanaethau, ond bod adnoddau'r Cynghorau Cymuned eu hunain yn brin ac y byddai cymryd baich oddi ar y Cyngor yn golygu cynnydd pellach yn eu preseptau hwythau.

Wrth drafod cydweithio nododd y Prif Weithredwr fod cynllunio a blaenoriaethu ariannol yn fater i'r Cynghorau eu hunain, ond byddai'r Cyngor yn annog cydweithio ac edrych ar bob opsiwn i warchod gwasanaethau.

9. YMATEB I YMGYNGHORIAD DIWYGIO ETHOLIADOL YM MAES DIWYGIO ETHOLIADOL YNG NGHYMRU

Cyflwynodd y Cynghorydd Mair Rowlands, Diprwy Arweinydd y Cyngor sylwadau drafft a baratowyd ar ran y Cyngor.

Cynigwyd ac eiliwyd cyflwyno'r sylwadau fel ymateb i'r ymgynghoriad.

PENDERFYNWYD Cyflwyno'r sylwadau fel ymateb i'r ymgynghoriad.

10. ADRODDIAD BLYNYDDOL YR ARCHWILIWR DOSBARTH

Cyflwynodd yr Arweinydd, y Cynghorydd Dyfrig Siencyn adroddiad blynyddol ar waith Swyddfa Archwilio Cymru ar Gyngor Gwynedd yn ystod 2016/17, gan nodi ei fod yn adroddiad cadarnhaol. Nododd Mr Jeremy Evans Rheolwr Llywodraeth Leol o Swyddfa Archwilio Cymru fod yr adroddiad yn crynhoi eu gwaith am y flwyddyn, gan ategu ei fod yn adroddiad positif ar y cyfan er bod rhai ardaloedd ble 'roedd lle i wella.

Cynigwyd ac eiliwyd i dderbyn yr adroddiad.

PENDERFYNWYD derbyn yr adroddiad.**11. ADRODDIAD BLYNYDDOL PANEL STRATEGOL DIOGELU**

Cyflwynodd y Cynghorydd Dilwyn Morgan, Aelod Cabinet Plant a Phobl Ifanc adroddiad blynyddol y Panel Strategol Diogelu. Nododd mai pwrpas yr adroddiad oedd diweddarau'r Cyngor ar yr hyn a gyflawnwyd yn y flwyddyn flaenorol. Pwysleisiodd fod diogelu yn flaenoriaeth uchel i'r Cyngor gyda'r Panel Strategol yn sicrhau trefniadau effeithiol. Nododd fod gwaith y Panel Strategol Diogelu yn ehangu wrth i gyfrifoldebau a gofynion y maes gynyddu, a'i fod yn gyfrifoldeb ar holl aelodau'r Cyngor.

Mewn ymateb i gwestiwn ynglŷn â'r gofynion ar lywodraethwyr ysgolion a'r hyfforddiant a chefnogaeth oedd ar gael iddynt, anogodd yr Aelod Cabinet Plant a Phobl Ifanc i unrhyw aelod o gorff llywodraethol ysgol i fanteisio ar hyfforddiant ar eu dyletswyddau yn y maes. Nododd y Cyfarwyddwr Corfforaethol bod ymdrechion wedi canolbwyntio ar gadeiryddion hyd yma, ond y byddai nodyn briffio yn cael ei gylchredeg i bob corff llywodraethu ysgol er mwyn hyrwyddo'r maes.

12. CYDBWYSEDD GWLEIDYDDOL Y CYNGOR

Cyflwynodd y Pennaeth Gwasanaethau Democrataidd adroddiad yn nodi'r sefyllfa ddiweddaraf o ran cydbwysedd gwleidyddol y Cyngor a dyraniad seddi ar bwyllgorau yn dilyn newidiadau diweddar.

Cynigwyd a eiliwyd i dderbyn yr adroddiad

PENDERFYNWYD mabwysiadu'r cydbwysedd gwleidyddol.

A	Plaid Cymru	Annibynnol	Llais Gwynedd	Llafur Rhyddfrydol	Llais Annibynnol Gwynedd	Cyfanswm
Pwyllgor Craffu Addysg ac Economi	10	5	2	0	1	18
Pwyllgor Craffu Cymunedau	10	5	2	1	0	18
Pwyllgor Craffu Gofal	10	6	1	0	1	18
Archwilio a Llywodraethu	10	5	1	1	1	18

B	Plaid Cymru	Annibynnol	Llais Gwynedd	Llafur Rhyddfrydol	Llais Annibynnol Gwynedd	Cyfanswm
Gwasanaethau Democrataidd	8	5	1	0	1	15
Cynllunio	8	4	1	1	1	15
Trwyddedu	8	5	1	1	0	15

Canolog						
Iaith	8	5	1	0	1	15
Penodi Prif Swyddogion	8	5	2	0	0	15
Apelau Cyflogaeth	4	2	1	0	0	7
Nifer seddau y	84	47	13	4	6	154

C	Plaid Cymru	Annibynnol	Llais Gwynedd	Llafur Rhyddfrydol	Llais Annibynnol Gwynedd	Cyfanswm
Pensiynau	4	2	0	1	0	7
Cydbwyllgor Ymgynghorol Lleol	6	3	1	0	1	11
CYSAG	4	3	0	0	0	7
Pwyllgor Polisi Cynllunio ar y cyd	5	2	1	0	0	8

Cyfanswm y seddau	103	57	15	5	7	187
--------------------------	------------	-----------	-----------	----------	----------	------------

13. CYFLEUSTERAU HAMDDEN – SEFYDLU CWMNI WEDI EI REOLI GAN Y CYNGOR

Cyflwynodd yr Aelod Cabinet Tai, Hamdden a Diwylliant adroddiad yn argymhell dechrau'r broses o greu cwmni wedi ei reoli gan y Cyngor er mwyn cymryd cyfrifoldeb dros ganolfannau hamdden Gwynedd. Nododd fod y gwasanaeth yn boblogaidd, ond fod y broses o ganfod arbedion wedi cyrraedd pen ei thaith heb ganfod yr arbedion angenrheidiol. Byddai sefydlu cwmni wedi ei reoli gan y Cyngor er mwyn rhedeg y gwasanaeth yn dod a hyblygrwydd ariannol nad oedd ar gael yn bresennol, tra ar yr un pryd yn galluogi gwarchod diwylliant unigryw'r gwasanaeth i'r dyfodol. Ni fyddai unrhyw newidiadau i delerau cyflogaeth y staff ar sefydlu'r cwmni, a byddai cydweithio agos rhwng y cwmni newydd a'r Cyngor.

Gan fanteisio ar y cyfle i ofyn cwestiynau a rhoi sylwadau croesawyd y cynnig i sefydlu'r cwmni fel cyfle i gynnig yr un gwasanaeth i drigolion Gwynedd ar lai o gost. Gofynnwyd i'r Cyngor beidio anghofio am Bwll Nofio Harlech, gan ofyn a fyddai'n bosib i'r adnodd lleol pwysig yma gael ei ymgorffori i'r cwmni newydd, neu ar y lleiaf gydweithio'n agos. O ran cyfansoddiad bwrdd rheoli'r cwmni nodwyd yr angen i sicrhau ystod eang o brofiad a syniadau ymysg yr aelodaeth er mwyn sicrhau llwyddiant. Pwysleisiwyd hefyd bwysigrwydd penodi'r Prif Weithredwr gorau ar gyfer y cwmni gan fod hynny wedi ei adnabod fel ffactor dyngedfennol mewn ardaloedd eraill ble'r oedd cynlluniau tebyg wedi eu sefydlu.

Mewn ymateb nododd y Prif Weithredwr fod yr hyblygrwydd ariannol oedd yn cael ei gynnig gan sefydlu'r cwmni yn creu achos cryf dros ddechrau'r broses o'i sefydlu. Nododd hefyd na fyddai'n dymuno i unrhyw ddrysau i gydweithio gael eu cau yn y rhan yma o'r broses. Wrth i'r broses o sefydlu'r cwmni fynd rhagddo byddai cydweithio agos gyda'r gyfundrefn Craffu er mwyn sicrhau fod trefniadau cadarn mewn lle. Nododd y Pennaeth Economi a Chymuned fod greu y cwmni yn gyfle gwych i adfywio'r sector Hamdden, tra'n gwarchod hunaniaeth a diwylliant y Cyngor yn y gwasanaeth. Byddai rôl Prif Weithredwr y cwmni arfaethedig yn hanfodol i gyflawni'r weledigaeth.

Mewn ymateb i gwestiwn ynglŷn â rôl swyddogion y Cyngor ar fwrdd y Cwmni arfaethedig o ran cyfrifoldeb ariannol, nododd y Swyddog Monitro fod cyfrifoldeb am sefyllfa ariannol y cwmni yn eistedd ar ysgwyddau'r cwmni yn hytrach na chyfarwyddwyr unigol oni bai am sefyllfaoedd eithriadol.

Cynigwyd ac eiliwyd i ddechrau'r broses o sefydlu cwmni wedi ei reoli gan y Cyngor ar gyfer cyfleusterau hamdden Gwynedd.

PENDERFYNWYD Dechrau'r broses o sefydlu cwmni wedi ei reoli gan y Cyngor.

14. RHYBUDDION O GYNNIG

Dim

Dechreuodd y cyfarfod am 1.00 y.h. a daeth i ben am 3.30 y.h.

CADEIRYDD